

Procedemento para dispensa de asistencia na EUTS

O Consello de Goberno da USC na sesión ordinaria de 25 de novembro de 2024 aprobou o Regulamento de asistencia a clase nas ensinanzas oficiais de grao e master na USC, con efectos plenos para o curso 2025-2026. Regula a dispensa de asistencia, control da asistencia ás actividades presenciais e a xustificación de faltas de asistencia.

A dispensa de asistencia a clase ten carácter excepcional e só se poderá conceder a falta doutra alternativa viable para cursar estudos en modalidade presencial, como é o cambio de grupo interactivo.

a) A Comisión de Título, por delegación da Xunta de Centro, poderá conceder a dispensa de asistencia a clase para casos específicos, logo da solicitude e acreditación das causas da petición e cando non impida que se acaden os obxectivos de aprendizaxe e as competencias indicadas na memoria verificada do título.

b) O estudantado poderá **presentar a solicitude de dispensa de asistencia a clase nos 5 primeiros días hábiles de cada semestre, ou posteriormente se concorresen causas imprevisibles e sobrevidas**, mediante a presentación dunha solicitude motivada ante a dirección do centro, que deberá acompañar dos documentos acreditativos que correspondan. Poderá solicitar a dispensa a clase para a totalidade das materias nas que estea matriculado ou, se a programación docente o permite, para unha parte delas ou para determinadas actividades.

c) Poderase solicitar a dispensa con base nas seguintes **causas**:

1. Enfermidade grave ou tratamentos médicos inaprazables que impidan a presenza do/a estudante no centro.
2. Embarazo de alto risco, ter menores a cargo de ata 3 anos de idade e coidado de persoas dependentes a cargo ata o segundo grado de consanguinidade ou afinidade, debidamente acreditados.
3. Prestación de servizos por conta allea ou por conta propia debidamente acreditada (alta no Réxime Xeral ou no de Autónomos da Seguridade Social, copia do contrato de traballo ou dos encargos a realizar, copia do recibo de pago da última cotización).
4. Situación de acoso, violencia de xénero ou similar así como supostos de adopción de medidas cautelares ditadas en procesos xudiciais e expedientes disciplinarios.
5. Calquera causa de forza maior debidamente acreditada a xuízo da Xunta de Centro ou comisión na que delegue.

d) Criterios e procedemento para a resolución das solicitudes de dispensa de asistencia a clase:

1. Para a resolución das solicitudes de dispensa o centro deberá ter en conta os seguintes criterios:
 - A excepcionalidade da medida.
 - A natureza dos estudos de Grao en Traballo Social, tendo en conta que a dispensa deberá ser denegada cando exista necesidade

acreditada de asistencia a certas materias ou actividades, en particular, as de contido fundamentalmente práctico.

- As posibilidades de adquirir as competencias por sistemas alternativos á asistencia a clase, previa consulta co profesorado responsable se fose necesario.
- O cambio de grupo interactivo non é unha opción viable.

2. A Comisión de Título deberá emitir un informe motivado para a resolución das solicitudes de dispensa.

3. A resolución de concesión de dispensa determinará, logo da consulta co profesorado afectado cando sexa necesario, o sistema de avaliación que debe seguirse. Poderase considerar un sistema diferenciado do criterio xeral, que debe permitir acadar a mesma puntuación que ao resto do estudantado.

4. A resolución que se dite comunicárase ao estudantado afectado mediante a publicación da resolución.

5. A concesión de dispensa de asistencia a clase terá efectos a partir da data de solicitude, e non terá efectos retroactivos.

6. Feita pública no taboleiro virtual a concesión de dispensa de asistencia, o/a estudante ten que **poñerse en contacto co profesorado da materia afectada nos 5 días hábiles seguintes** a ser publicada a resolución.

7. Poderá presentarse reclamación á resolución nos 5 días hábiles seguintes a publicación da mesma.

e) Alternativas á dispensa de asistencia a clase.

O/A estudante no que concorra algunha das causas para a solicitude de dispensa deberá solicitar simultaneamente un cambio de grupo, agás que polas súas circunstancias non sexa unha opción viable para el/ela. No caso de non aceptarse o cambio de grupo valorarase a solicitude de dispensa. Terá preferencia o estudantado con obrigas familiares e persoais acreditadas.

No caso de que a solicitude de dispensa de asistencia a clase non sexa aceptada o/a estudante, unha vez coñecida a resolución denegatoria, poderá formular ante o Servizo de Xestión Académica unha solicitude extraordinaria de cambio de matrícula nos seus estudos a dedicación parcial. Na resolución desta solicitude terase en conta os límites fixados respecto ao número máximo de estudantes a tempo parcial na titulación.

f) O estudantado con necesidades educativas especiais.

Éste estudantado deberá ter unha planificación e seguimento de actividade académica adaptada á súa situación. O órgano da USC con competencias na materia emitirá unha resolución coas adaptacións que procedan e comunicará a persoa interesada, á Dirección do centro e ao profesorado afectado para a súa concreción e execución. Tamén poderá solicitar unha dispensa de asistencia a clase con adaptación do sistema de avaliación.